

Nei til vindkraftutbygging i Kvinnherad

Olje- og energidepartementet ber om tilbakemelding på om min heimkommune Kvinnherad er eigna for vindkraftutbygging. Svaret er nei! NVE har kome fram til 13 områder som er spesielt godt eigna for vindkraftutbygging. Dei skriv at dei har "lagt vekt på å unngå konflikter med viktige naturområder, og tatt betydelige hensyn til aktuelle tema, for eksempel friluftsliv, støy, fugle- og dyreliv, kulturminner og reindrift." Når store deler av fjellområda i Kvinnherad kommune er del av desse aktuelle områda tyder dette på at kunnskapsgrunnlaget ikkje har vore godt nok i analysen. Eg oppmodar difor departementet om å lese **Kvinnherad Turlag** sin høyringsuttale nøye. Her er det lagt ned eit enormt arbeid i å nettopp få fram denne kunnskapen.

Olje- og energidepartementet spør også om det er nødvendig med ei nasjonal ramme for vindkraft på land. Svaret på det er ja. Det har vore nødvendig for å gjere oss bevisste på kva enorme øydeleggingar vindkraftutbygging på land kan føre til. Det har vakse fram ei folkerørsle i Noreg mot vindkraftutbygging. Eg trur ikkje dette hadde skjedd om det ikkje var for arbeidet med nasjonal ramme for vindkraft på land. Også i min heimkommune har protestane vakse seg store. I Kvinnherad bur det 13 000 innbyggjarar. Facebook-gruppa «Nei til vindmøller i Kvinnherad» har nå nesten 4800 medlemmer. Aksjonsgruppa med same namn har jobba aktivt i fleire månadar med å spreie informasjon, og har hatt ei sterk støtte blant innbyggjarane. Eit samla kommunestyre gjekk inn for å fjerne alle områder i Kvinnherad frå nasjonal ramme (sjå høyringsuttale frå Kvinnherad kommune). Eg er stolt av å vere frå Kvinnherad i dag når eg ser korleis mine sambygdingar samlar seg om å verne naturen vår. Eg trur at nasjonal ramme for vindkraft på land har gjort det vanskeleg for dei som skulle ønskje å bygge vindkraftverk i Kvinnherad.

Eg ber styresmaktene om å ta det sterke engasjementet i Kvinnherad, og mange andre stadar i landet, til etterretning. Nasjonale styresmakter har her ein gyllen moglegheit til å vise at dei meiner alvor når dei har snakka om meir makt ut til kommunar og fylker som følgje av kommunereformar og fylkesreformar. Eg minner om at også nye Vestland fylke har sagt nei til meir vindkraftutbygging i fylket. Vindkraftutbygging i Kvinnherad vil ha så store konsekvensar for natur, friluftsliv, fugle- og dyreliv, folkehelse, tilflytting og trivsel at dette ikkje er noko sentrale styresmakter kan pålegge oss mot vår vilje. Å ikkje høyre på vårt soleklare nei vil vere ein forakt for lokaldemokratiet!

Me som lever i dag har eit ansvar for å ta vare på kloden vår. I Kvinnherad er 90 % av alle vassdrag utbygd. Kvinnherad bidreg med 3 % av all grøn energi i Noreg. Me tek ansvar. Men me har også eit ansvar for den naturen me har rundt oss, og me reddar ikkje miljøet ved å rasere naturen! Me har eit ansvar for at dei som kjem etter oss også skal få oppleve dei gode naturopplevingane ute i naturen, og me har eit ansvar for planter, dyr og fuglar som har denne naturen som sin heim.

Eg elsker naturen i Kvinnherad. Ikkje gjer den om til eit industriområde!

Mari Teigen Varanes

Vedlagt ser du bilder frå nokon av dei finaste stadane eg veit om i Kvinnherad. Alle desse stadane ligg inne i nasjonal ramme for vindkraft på land.







